



鐘鼓聲

人講：「莫飲卯時酒，昏昏醉到酉；莫罵酉時妻，一夜都孤栖。」卯時、酉時，係一日愛起頭還過收工个時節，乜係吾印象裡肚鐘鼓聲傳透山園个時節。逐日个朝晨頭打早還過臨暗邊仔，恩主公个鐘鼓聲，都會對山頂準時个傳下來。

「做！嘖、嘖，做！嘖、嘖，做！……」第一槌鐘聲係愛警醒人間人，一日个修練又愛開始哩；莊重个鐘鼓聲，緩緩仔喚醒萬物个朝晨。勻勻个鐘鼓聲通透到看毋著个天庭、傳遍四季个山園、喊醒幾下代个人，長時个印記在吾个腦殼裡肚。該係逐日朝晨頭，迎神接駕个鐘鼓聲，乜係一日起勢个儀式。

「三十六鐘、七十二鼓」係迎神接駕、奉茶送駕个鐘鼓聲，乜係一日就愛起工、收煞个時間記號。雖然，朝晨、臨暗共樣係三十六鐘、七十二鼓，毋過打法無共樣：朝晨頭係先鐘後鼓，臨暗仔係先鼓後鐘；朝晨頭个鐘鼓聲會略略仔放慢，臨暗仔个鐘鼓聲會略略仔加緊。有緊有慢个鐘鼓聲，喊醒吾人生个幾下千隻朝晨、跔佢送走不少個紅霞，不時都會在吾心肝裡肚響起。

聽科儀先生講：「鼓通天曹，鐘透地府。」若係恁樣，鐘鼓聲就毋單止喚醒目睡摸些个佢，還通透得來神明个庇佑，還過祖輩个保護。佢還聽得著个鐘鼓聲，既經過身个祖輩聽得著無？佢乜毋知。毋過，在鐘鼓聲裡肚，佢總會恁起臨暗頭阿婆个吩咐：「毋好過搞咧，若姆愛煮飯咁，好轉去搵手哩！」「啊哦，愛食夜哩，僇兜愛較遽手兜仔！」鐘鼓聲，係時間个記號，乜留有當多吾人生个記號。

「嘖、嘖，做！嘖、嘖，做！……做！」臨暗仔个鐘鼓聲比朝晨頭个有較緊板兜仔，聽先生講正知，佢毋係追婦人家遽遽轉屋煮夜，乜係打鼓師傅愛趕事轉夜。略略仔緊板个鐘鼓聲，係提醒人，隨等盡尾一槌个鐘聲，清淨一日个昏哆、安定需要安靜个心靈。

鐘鼓聲，安定過佢心野野仔个青春，喊醒過一莊仔人、通透到吾記憶裡肚个山園。留在吾腦殼裡肚个鐘鼓聲，不時都還會響起，該緩緩仔、勻勻仔起、落个聲哨，就像人生个腳步聲。

作者：彭瑞珠

☆詞彙學習☆

【紅霞】fungˋ haˋ：紅色雲霞。

【昏哆】funˋ deˋ：昏沉。

【目睡摸些】mugˋ soi miaˋ xiaˋ：睡眠惺忪。

【心野野仔】ximˋ iaˋ iaˋ eˋ：玩心重、靜不下心。

☆文法學習☆

【……過……】go：再、又。表示動作再次、重複進行。

例1：毋好過行哩，過边咁。（不要再走了，超過了。）

例2：你過撩佢！佢會譴吓！（你又弄他！他會生氣嘅！）